

TRANTER UMENS

da Chatrina Josty

WG CUN BAP E MAMMA

Igl eran vacanzas da semester. Super, per mai, sco studenta en il emprim onn n'hai jau anc betg stuvì scriver lavurs ed uschè avess jau gì 5 emnas simplamain vacanzas. Mo vacanzas? In pau lungurus, hai jau pensà e tschertgà in job. L'idea era ensasez da restar a Fribourg. Ma lura hai jau chattà ina lavur en Engiadina. Cun quai hai gì num turnar a chasa, a Bravuogn, e prender mintga di il tren per Schlarigna, en mia bella unifurma mellen-blaua da magisters da skis. (Tge ti? Gea, gea. Jau hai fantasia, sch'igl va per chattar lavur...).

Avair in job en Engiadina ha damai gì num per mai puspè star a chasa, vul dir en la «wg mamma&bap». Turnar en quella wg n'era betg uschè simpel, «wg mamma&bap» è dapi insaquants onns numnadamain adisada dad esser ina wg da dus. Cun ina fin trais personas dapli la fin d'emna. La «wg mamma&bap» è damai ina wg cun sias atgnas reglas e ses rituals fixes.

Ils plazs sin il canapé èn repartids, e vehe sche insatgi (jau) prenda quel da mamma. Discussiuns sur dal progam da televisiun na datti betg, era tar films ch'ins ha gia vesì ina giada. La wg da dus as vesa er en bogn, nua ch'ina giada eran circa 7 barschuns da dents è ussa mo pli in eletric. «Nus prendin tuts dus quel, e ti has segir in en tia tastgetta da tual-etta.» Tut naging problem, mo che la maschina da lavar da la «wg mamma&bap» na cumpor- ta betg pli mia purziun da vestgadira ma para in pau curius. Cun in pèr chautschinas dapli è'la surchargiada, strapatschada perquai era la nerva da mamma. Conflicts (era sche mo pervi da in pèr chautschettas) vegnan purtads ora directamain en la «wg mamma&bap». Il nivel da canera è in pèr giadas creschì magari spert durant mia dimora a Bravuogn. Ensasez però bel, sch'igl vegn fatg dispitta en ina wg. Ed il pli bel era che suenter 10 minuts era adina tut puspè en urden, en la «wg mamma&bap». En ina armonia essan nus lura sesì tuts ensemen sin il canapé, mintgin sin ses plaz, sa chape-scha, ed en la televisiun ha Derrick per la 1000 avla giada tschiffà il medem nauschun. Jau m'allegr tuttina da turnar en mia atgna wg a Fribourg.

Chatrina Josty, studenta a Fribourg scriva da sia vita en ina WG cun dus umens.